


# Individuell vurdering i vidaregåande opplæring

## Rettleiingshefte

Juni 2010



HORDALAND  
FYLKESKOMMUNE





Dei vidaregåande skolane i Hordaland

Vår ref.: (nyttast ved korrespondanse)  
201006735-1/522/SIGHIL

Dykkar ref.:

Bergen, 21. juni 2010

## Individuell vurdering i vidaregåande opplæring

Ei arbeidsgruppe har våren 2010 arbeidd med å revidere rettleiingsheftet om vurderingspraksis i tråd med kapittel 3 i ny forskrift til opplæringslova som tok til å gjelde frå 1. august 2009. Revisjonen kom i gang etter ønskje frå fleire skolar som har nytta heftet i arbeidet med vurdering.

Hovudmålet for den vidaregåande opplæringa i Hordaland for skoleåret 2010-2011 er auka læringsutbytte og fullføring. For å støtta opp under denne målsettinga er eitt av tiltaka som skal ha særskild merksemd, *Vurdering av elevane si læring*; det andre er *Den digitale skolen* ( sjå Styringsdokument 2010-2011). Ofte kan det vere naturleg å sjå desse områda som to sider av same sak. Alle skolane skal synleggjere tiltaka innan desse områda i utviklingsplanane.

Elevvurdering er óg eit nasjonalt satsingsområde, som vi Hordaland har følgd opp på fleire måtar. FAU-gruppene har arbeidd med vurderingsfeltet frå innføringa av kunnskapsløftet, og kan gi skolane hjelp i vurderingsarbeidet. Gjennom prosjektet *Betre vurderingspraksis* har dei tre skolane frå Hordaland som deltok, opparbeidd kompetanse på vurderingsfeltet. Lærarar frå desse skolane har besøkt lærargrupper ved andre skolar i fylket.

I samarbeid med Universitetet i Bergen har Opplæringsavdelinga sett i gang eit pilotprosjekt, *Vurdering for læring*, som har som hovudmål å utvikle ein vurderingskultur i skolane i HFK og som støt opp om målet om auka læringsutbytte og fullføring. Pilotprosjektet skal medverke til å utvikle og styrke vurderingskulturen på skolane, lærarane sin kompetanse i vurdering og elevane sin vurderingskompetanse. Seks skolar deltar i prosjektet som starta hausten 2009 og skal avsluttast våren 2011. Desse skolane har forplikta seg til å dele på kunnskapen dei oppnår gjennom prosjektet.

Skolane må ta i bruk kompetansen som finst lokalt og/eller sentralt i det systematiske arbeidet med å auke vurderingskompetansen og betre vurderingspraksisen på skolane. Det er rektor sitt ansvar å følgje arbeidet på vurderingsfeltet på skolen. Opplæringsdirektøren oppmodar også skolane om å legge dette heftet ut på heimesidene, til informasjon for elevar og føresette.

  
Svein-Erik Fjeld

1	Innleiing .....	3
2	Vurdering .....	4
3	Undervegsvurdering .....	5
4	Eigenvurdering .....	6
5	Halvårsvurdering i fag .....	7
6	Halvårsvurdering i orden og åtferd .....	7
7	Samtalar .....	8
7.1	Startsamtalen .....	8
7.2	Utviklingssamtale .....	8
7.3	Dialog om anna utvikling .....	9
8	Dokumentering .....	9
9	Sluttvurdering i fag .....	10
10	Varsling .....	10
11	Nettstader om vurdering .....	11
12	Skolar i Hordaland som deltok i <i>Betre vurderingspraksis</i> .....	11
13	Skolar som deltar i pilotprosjektet <i>Vurdering for læring</i> .....	11
14	Arbeidsgruppe – rettleiingsheftet .....	12
15	Litteratur .....	12
16	Vedlegg .....	12

## Opplæringslova

Opplæringa skal gi dei unge kunnskapar, haldningar og verdiar som gjer dei i stand til å klare sitt eige liv, og delta i arbeids- og samfunnsliv. Dette blir uttrykt i § 1-1 i Opplæringslova, og ligg til grunn for alt arbeid i skolen. I vurderingsarbeidet må vi ha med oss dette heilskaplege perspektivet.

### § 1-1. Formålet med opplæringa

*Opplæringa i skole og lærebedrift skal, i samarbeid og forståing med heimen, opne dører mot verda og framtida og gi elevane og lærlingane historisk og kulturell innsikt og forankring.*

*Opplæringa skal byggje på grunnleggjande verdiar i kristen og humanistisk arv og tradisjon, slik som respekt for menneskeverdet og naturen, på åndsfridom, nestekjærleik, tilgjeving, likeverd og solidaritet, verdiar som òg kjem til uttrykk i ulike religionar og livssyn og som er forankra i menneskerettane.*

*Opplæringa skal bidra til å utvide kjennskapen til og forståinga av den nasjonale kulturarven og vår felles internasjonale kulturtradisjon.*

*Opplæringa skal gi innsikt i kulturelt mangfald og vise respekt for den einskilde si overtyding. Ho skal fremje demokrati, likestilling og vitskapleg tenkjemåte.*

*Elevane og lærlingane skal utvikle kunnskap, dugleik og holdningar for å kunne meistre liva sine og for å kunne delta i arbeid og fellesskap i samfunnet. Dei skal få utfalde skaparglede, engasjement og utforskartrøng.*

*Elevane og lærlingane skal lære å tenkje kritisk og handle etisk og miljøbevisst. Dei skal ha medansvar og rett til medverknad.*

*Skolen og lærebedrifta skal møte elevane og lærlingane med tillit, respekt og krav og gi dei utfordringar som fremjar danning og lærelyst. Alle former for diskriminering skal motarbeidast.*

Som ”pedagoger er hovedmålet vårt å hjelpe elevene å finne glede i å lære, hver og en i sitt tempo og i forhold til individuelle evner. Gjennom fremoverseende vurdering er det mulig å holde motivasjonens flamme i live; læringens pris blir oppnåelig for den enkelte elev”.  
Kari Smith, Norsk Pedagogisk Tidsskrift 1/2007

## 1 Innleiing

Med dette heftet ønskjer vi å gi eksempel på korleis praksis kan vere i høve til dei ulike paragrafane i ny Forskrift til opplæringslova. I heftet er ulike paragrafar omtalt, heile kap. 3 i forskrifta ligg ved (vedlegg 1).

Frå 01.08.09 blei den nye forskrifta gjort gjeldande. Bakgrunnen var mellom anna det som kom fram i St. meld. nr. 16 (2006-2007), ”... og ingen stod igjen,” der det blei hevda at ”i norsk skole har evalueringskulturen ført til utilstrekkelig oppfølging av elevene og redusert deres faglige utviklingsmuligheter”, og der det også blei understreka at vurdering skal bli meir ”likeverdig og rettferdig” (s.79). Skolane sin vurderingspraksis skal vidareutviklast slik at ”alle elever skal få faglige, realistiske og nødvendige tilbakemeldingar og slik øke læringsutbyttet” (s. 97).

Kunnskapsløftet understrekar at læringsutbyttet skal aukast for elevane. Dette kjem mellom anna fram i Læringsplakaten som seier at skolen skal ”stimulere elevane og lærlingane/lærekandidatane til å utvikle eigne læringsstrategiar og evne til kritisk tenking”. På denne måten skal elevane utvikle evne til å bruke kunnskapen sin i nye situasjonar.

Hovudprinsippa forskrifta bygger på, er at elevane skal forstå kva dei skal lære og kva som er forventa av dei. Dei skal ha tilbakemeldingar/framovermeldingar som fortel dei om kvaliteten på arbeidet eller prestasjonen, og dei skal få råd om korleis dei kan forbetre seg. Elevane skal også vere med å vurdere sitt eige arbeid. Dei må øvast opp til å bli ein aktiv part i vurderingsarbeidet.

Det er ikkje slik at det er om å gjere å ha så mange karakterar som råd. Det er opp til lærar i samråd med elevane å vurdere i kor stor grad karakterar skal nyttast i undervegsvurderinga, med formålet å fremme læring. Formelt stiller forskrifta krav om berre to karakterar i året; halvårs- og/evt standpunkt karakter.

Forskrifta underbygger at vurderinga skal gi informasjon og rettleiing som fører til personleg framgang. Opplever eleven denne framgangen, kan det vere motivasjonsfremjande, noko som igjen fører til auka interesse for å lære meir. Læraren bør samtale med elevane om korleis han/ho vil drive vurderingspraksisen slik at elevane blir bevisste på når vurdering blir gitt og korleis dei best lærer.

Forskrifta seier at undervegsvurdering skal dokumenterast, men ikkje korleis dette skal gjerast i praksis. I og med at skolane har ulike elevgrupper, kan dei ha ulik vurderings- og dokumenteringspraksis. I dette heftet legg vi opp til eit minstekrav i tråd med *Meld. St. 19 Tid til læring* med så lite byråkratsering som råd, innanfor krava i forskrifta.

Forskrifta bruker omgrepet ”individuell vurdering” for å skilje det frå til dømes skolebasert vurdering. Og individuell vurdering omfattar både elevar, lærlingar, lære kandidat, praksiskandidat, elevar og lærlingar. I dette heftet tenker vi på vurderinga av arbeidet elevar gjer, men kan også overførast til dei andre gruppene forskrifta gjeld for.

Paragrafane 3-1 til 3-11 er generelle føresegner, og vil bli kommentert der det er naturleg i høve til praksis.

Skal klasseromsvurdering ha noko som helst sjanse til å gi seg utslag i form av forbetra læring og betre elevprestasjonar, er nøkkelen systematisk gjennomføring over lang tid og stor grad av elevinvolvering frå første stund. Det gjeld same kva for strategiar og reiskapar skulen eller lærarteamet vel å satse på.  
Olga Dysthe: Bedre skole, nr 4 2008

## 2 Vurdering

Vurdering i fag har to føremål (§3-2):

- fremje læring og utvikling hos eleven
- uttrykke kompetansen til eleven

Forskrifta skil mellom to typar vurdering:

- undervegsvurdering
- sluttvurdering

Sluttvurderinga er standpunkt karakterar og eksamens karakterar. All anna vurdering er undervegsvurdering. Elevane i vidaregåande opplæring skal ha både undervegs- og sluttvurdering.

Undervegsvurderinga ”skal brukast som reiskap i læreprosessen, som grunnlag for tilpassa opplæring og bidra til at eleven, lærlingen og lære kandidaten aukar kompetansen sin i fag” (§3-2). Dette betyr at elevane må få tydelege tilbakemeldingar på kvar dei står i høve til kompetansemåla. Denne vurderinga ”skal gis løpande og systematisk og kan vere både munnleg og skriftleg” (§3-11). Dette blir omtalt som *vurdering for læring*.

Sluttvurderinga skal ”gi informasjon om kompetansen til eleven, lærlingen og lære kandidaten ved avslutninga av opplæringa i fag i læreplanverket” (§3-17). Dette blir omtalt som *vurdering av læring*.

Vurderingane skal vere målrelaterte. Kvaliteten på resultatet til den enkelte eleven blir bestemt på grunnlag av måloppnåinga i forhold til kompetansemål i læreplanen, uavhengig av prestasjonane til dei andre elevane (§3-3).

### 3 Undervegsvurdering

Undervegsvurderinga skal brukast som reiskap i læreprosessen, vere grunnlag for tilpassa opplæring og bidra til at eleven aukar kompetansen i fag. Undervegsvurderinga skal gis løpande og systematisk og kan vere munnleg og skriftleg.

Den enkelte skole sitt systematiske arbeidet for å utvikle ein felles vurderingspraksis, bidrar til eit betre tolkingsfellesskap i det enkelte faget, og på tvers av faga. Den enkelte skole må finne si form på dette arbeidet.

Det er ikkje krav om at det skal brukast karakterar i undervegsvurderinga bortsett frå halvårsvurderinga. I undervegsvurderinga skal eleven si læring vere i fokus, ikkje eit mål om å ha så mange delkarakterar som råd.

#### Lærarperspektivet

Olga Dysthe\* foreslår følgjande tilnærming:

Tenk vurdering på kort, mellomlang og lang sikt

- Ha fokus på tilbakemeldingspraksis:
  1. systematisk
  2. realistisk (gjennomførbart) – kva skal givast til samla klasse? Grupper? Individuelt?
  3. knytt til mål
  4. basert på fagspesifikke kriterium (men tenk heilskapleg)
  5. elevmedverknad (drøfte mål og kriterium, dialog om eige arbeid)

\*

”Klasseromsbasert vurdering som fremmar læring.

Fokus på tilbakemeldingspraksis”  
(Foredrag 20.10.09)

#### Elevperspektivet

Hatties\* spørsmål som elevane må få svar på:

- Kvar skal eg? Kva er målet? (Feed up)
- Korleis har eg gjort det? (Feed back/tilbakemelding)
- Kva skal eg gjere for å bli betre? (Feed forward/framovermelding)

Dette er ferdigheiter som eleven må trene på.

Spørsmåla kan stillast til

- produktet - oppgåve, arbeid, utkast
- prosessen
- eigeninnsatsen - ikkje på personen, men på det konkrete som er gjort.

\*

”The power of feedback” (2007)

Students can achieve learning goal only if they understand that goal and can assess what they need to do to reach it. So self-assessment is essential to learning.  
Black & Wiliam m/fl: Working Inside the Black Box. 2004

#### 4 Eigenvurdering

Eleven skal delta aktivt i vurderinga av eige arbeid, eigen kompetanse og eiga fagleg utvikling.

##### Eksempel på eigenvurdering

- Samtale mellom elev og lærar.
- Eit viktig element i elevmedverknaden er å leggje til rette for situasjonar der dette kan skje. Eigenvurderinga kan skje anten før eller etter karaktersettinga. Elevane kan foreslå karakter på eige arbeid; anten delar av eit arbeid eller heile arbeidet.
- Eigenvurderinga kan også vere ein logg etter eller undervegs i eit arbeid.
- Eigenvurderinga kan vere innspelte lydfiler.
- I SkoleArena/Vurdering er det eit eige felt "Elevens vurdering". Her kan eleven skrive eigenvurdering rett etter at ei prøve er avslutta.
- Proessorientert skrivning kan gjere eleven meir aktiv og bevisst i eigen læringsprosess.
- Bruk av den europeiske språkpermen aukar elevmedverknaden i språkfaga.
- Eigenvurdering kan foregå i ei elevgruppe.
- Mappedvurdering
- Vurdering av eigne produkt, og prosessen fram til produktet.
- Eleven kan foreslå halvårsvurderinga.

##### Grunngiving for eigenvurdering

- Ved å vurdere eige arbeid vil eleven bli bevisst om eige læringsarbeid.
- Er eleven medviten kvar han/ho står reint fagleg, og kva lærebehov han/ho har, hjelper det læraren slik at opplæringa kan tilpassast så godt som råd.
- Forsking viser at eigenvurdering fungerer best før karakteren er gitt.
- Samtale er den beste måten å drive eigenvurdering (jmf Lars Helle).

##### Dokumentering:

- Faglærer og elev kan avtale korleis eigenvurdering skal gjerast.
- Eigenvurderinga kan brukast som skriftleg reiskap i dokumentering av undervegsvurderinga.
- Eigenvurderinga kan vere ein del av halvårsvurderinga utan karakter.
- Sjølv om eleven vurderer sitt eige arbeid, er det læraren som fastset karakteren.
- Skolen avgjer korleis dokumenteringa skal skje.

## 5 Halvårsvurdering i fag

Eleven skal ha halvårsvurdering både med og utan karakter. Halvårsvurdering utan karakter skal bli gitt gjennom heile grunnopplæringa. I vidaregåande opplæring skal det bli gitt halvårskarakter midt i opplæringsperioden på kvart årstrinn (§3-13)

Eksempel på praksis:

- Halvårsvurderinga utan karakter kan vere munnleg eller skriftleg.
- Halvårskarakteren skal først i SkoleArenaVurdering
- Grunngeving for karakteren og kort forklaring på kva eleven må arbeide med for å bli betre (framovermelding), kan også skrivast her viss munnleg grunngeving ikkje er gitt.

Merknader:

- Dersom opplæringa blir organisert over kortare tid ("plogging"), skal halvårsvurderinga bli gitt midt i perioden som opplæringa blir organisert i.
- Det er berre krav til karakter ved halvårsvurderinga og standpunktvurderinga.

## 6 Halvårsvurdering i orden og åtfærd

Halvårskarakter i orden og i åtfærd skal givast med og utan karakter i heile utdanningsløpet (§3-15). Skal karakteren setjast ned, må det varslast (§ 3-7)

Ordensreglementet ligg til grunn for praksis.

Forslag til praksis

- Eleven sin orden og åtfærd kan bli tatt opp i start- og utviklingssamtalen.
- Halvårsvurderinga i orden og i åtfærd skal gjerast i samarbeid mellom kontaktlærar og dei andre lærarane eleven har.

Merknader

- I vurderinga i orden og åtfærd skal det takast omsyn til elevane sine føresetnader.
- Berre standpunkt karakteren i orden og i åtfærd skal på vitnemålet:
  - yrkesfag vanlegvis etter Vg2,
  - studiespesialiserande etter Vg3
- Fastsettinga av karakteren er ei heilskapleg og skjønsmessig vurdering. Det må ikkje setjast absolutte grenser for talet på merknader for å setje ned elevane.
- Vi minner om at forhold som påverkar orden og/eller åtfærd, ikkje må påverke dei faglege vurderingane.

## 7 Samtalar

### 7.1 Startsamtalet

Hordaland fylkeskommune har innført obligatorisk startsamtale for alle elevar. Sjå It's learning under faget "Kontaktlærarar".

### 7.2 Utviklingssamtale

Eleven har rett til samtale med kontaktlærar minst ein gong kvart halvår om utviklinga i forhold til kompetansemåla i faga (§3-11) som ein del av undervegsvurderinga. Kontaktlærar har ansvaret for denne samtalen, men rektor kan delegere samtalen til faglærar. Kontaktlærar vil truleg ha den beste oversikta over korleis eleven gjer det, og derfor er det naturleg at han/ho gjennomfører samtalen.

Føremålet med samtalen er

- å uttrykke den kompetansen eleven har i dag og
- å skape grunnlag for auka læring gjennom å motivere eleven til å auke kompetansen sin.

Samtalen skal handle om utvikling i faga, og derfor har vi har valt å kalle denne samtalen *utviklingssamtale*. Denne erstattar det som tidlegare har vore elevsamtalen og fagsamtalen. Ved sida av det faglege kan også orden og åtferd bli tatt opp.

Denne samtalen er ein rett elevane har, ikkje ein plikt. Møter dei ikkje, må dei be om nytt møte. Kontaktlæraren må dokumentere at eleven er kalla inn. Dette gjeld ikkje dei elevane kontaktlæraren *må* snakke med fordi han/ho må følgjast opp spesielt.

Forslag til praksis:

- Eleven kan be om samtale med faglærar ved behov.
- Samtalen må ta utgangspunkt i elevane sine utfordringar.
- Faglærar gir beskjed til kontaktlærar om det er noko spesielt han/ho vil skal bli tatt opp i samtalen.
- Det kan vere nyttig å gjennomføre klasselærarråd før slike samtalar.
- Samtalen må vere førebudd frå begge partar, og tid og stad avtalt på førehand.
- Kontaktlærar må dokumentere at eleven er kalla inn til samtale.
- Skolen må komme fram til ein eigen praksis.

Merknader/forslag til dokumentasjon:

- Eitt av føremåla med samtalen er å gi eleven eit meir aktivt forhold til eiga læring.
- Skolen må finne sin eigen praksis.
- Vi anbefaler at avtalane som blir gjort i samtalen, blir skriven ned.
- Eleven kan skrive referat på slutten av samtalen eller i ITL eller SkoleArenaVurdering etter samtalen. Dette er god dokumentasjon. Elev og lærar bør signere/godkjenne dette.
- Det skal registrerast at samtalen er gjennomført – minimum med dato.

Sjå "Elevsamtalen" s. 64 i "Elevvurdering" EK Høihilderen (red.)

Det er for tida høyring om endring av opplæringslova i forhold til foreldresamarbeid i vidaregåande opplæring; der talet på foreldremøte og samtalar der foreldra deltar, blir regulert.

### 7.3 Dialog om anna utvikling

Eleven har rett til jamleg dialog med kontaktlærer om utviklinga i lys av opplæringslova §1-1, generell del og prinsipp for opplæringa i læreplanverket (§3-8)

- Denne dialogen kan foregå i samla klasse, eller i mindre grupper av elevar, der ein tar opp formuleringane i lova og generell del av læreplanen.
- Læraren kan samtale med einskildelevar viss det passar best.
- Ein elev kan be spesielt om samtale.

Dialog om anna utvikling er ein rett til å gi og få tilbakemeldingar på korleis elevane utviklar seg i forhold til dei overordna måla for opplæringa (jmf OPL §1-1), og korleis dei kan bidra til eit læringsmiljø der læreplanverket for LK06 og prinsipp for opplæringa blir realisert.

Generell del utdjupar opplæringslovas § 1-1, gir dei overordna måla og inneheld det verdimesige, kulturelle og kunnskapsmessige grunnlaget for grunnopplæringa. Prinsipp for opplæringa inneheld Læringsplakaten som består av mål for skolen og lærebedrifta. Prinsippa tydeleggjer skoleeigar sitt ansvar for ei opplæring som er i samsvar med lov og forskrifter.

## 8 Dokumentering

Det skal kunne dokumenterast at undervegsvurdering er gitt (§3-16)

- Å dokumentere undervegsvurderinga betyr ikkje at det skal skrivast lange utgreiingar. Det sentrale er at elevane har fått den undervegsvurderinga dei har krav på.
- Dokumenteringa kan gjerast i SkoleArenaVurdering .
- Dokumenteringa kan gjerast ved at eleven signerer på ei liste at undervegsvurderinga er gitt.
- Læraren kan beskrive korleis arbeidet med undervegsvurderinga har vore gjort.

- I Hordaland skal alle undervegs- og halvårskaraktarar førast i SkoleArenaVurdering. Dette er det einaste kravet HFK stiller til føring av karakterar.
- Får elevane undervegsvurderinga digitalt, er det god nok dokumentasjon.
- Pedagogiske metodar avgjer kva dokumentasjonsformer som er aktuell.

## 9 Sluttvurdering i fag

Sluttvurdering er standpunktkarakter og eksamenskarakter (§3-17).

Standpunktkarakterar er karakterar gitt ved avslutninga av opplæringa, og som skal førast på vitnemålet (§ 3-18)

- Sluttvurderinga skal gi informasjon om kompetansen til eleven ved avslutninga av opplæringa i faget.

- Sluttvurdering er eit enkeltvedtak og kan klagast på

### Vurderingsgrunnlag

- Standpunktkarakteren skal setjast på eit breitt vurderingsgrunnlag som samla viser kompetansen; både på vurderingar med karakter og utan karakter.
- Undervegs- og sluttvurderinga må sjåast i samanheng. Kunnskapen læraren har fått om eleven si måloppnåing, gir grunnlag for å fastsette standpunktkarakter.

### Merknader

- Standpunktkarakteren skal ikkje setjast ut frå eit matematisk gjennomsnitt på prøvene gjennom året.
- Standpunktkarakteren er sett når den er skriven i SkoleArenaVurdering. Det er ikkje krav om eigne møte for å sette denne.

For fag som går over fleire år; er det berre karakter på Vg3 (Stusp.) og Vg2 (Yrkesfag) som skal stå på vitnemål/kompetansebevis. For yrkesfag gjeld dette kroppsøving, norsk og engelsk som blir avslutta på Vg2. For studiespesialisierende gjeld det norsk, framandspråk, historie og kroppsøving. Dette gir større rom for alternative arbeidsmetodar.

## 10 Varsling

Det skal varslast skriftleg viss eleven har manglande vurderingsgrunnlag i fag og er i fare for å få nedsett karakter i orden eller åtferd (§ 3-7). Foreldra skal også varslast for elevar under 18 år.

Det er **ikkje** krav om varsling dersom eleven står i fare for å få karakteren 1 i halvårsvurdering eller i standpunktkarakter.

Føremålet med eit varsel er at eleven skal ha høve til å rette opp problemet; derfor må varselet bli gitt så tidleg som råd. Varselet gjeld berre for det aktuelle halvåret. Det må bli gitt nytt varsel dersom det også er fare for nedsett karakter neste halvår.

Enkelthendingar som er særleg grove, kan føre til at karakteren i orden og åtferd blir sett ned (§ 3-5). I desse tilfella er det ikkje ein "fare" for at karakteren skal setjast ned, karakteren i halvårsvurdering eller standpunkt skal da setjast ned. I desse tilfella har det ingen hensikt å gi varsel. Men eleven må bli underretta om avgjersla. Avgjersla om å setje ned karakteren skal da vere eit enkeltvedtak, og eleven kan klage på refsingstiltaket (jmf Opl § 15-2). Dette vil gjelde når hendinga skjer like før karakteren skal setjast, og truleg vere sjeldan. Vi anbefaler å gi varsel i alle tilfelle.

## 11 Nettstader om vurdering

Vurdering for læring (Udir)

<http://www.skolenettet.no/Moduler/Vurdering/Templates/Pages/StartPage.aspx?id=64600&epslanguage=NO>

På denne nettsida finst det stoff om kva vurdering for læring er, filmar frå skolar, vurderingsverktøy, vurderingsforskrifta og rettleiingar i Kunnskapsløftet. Ein brosjyre som gir oversikt over viktige prinsipp og reglar om vurdering på ungdomstrinnet og vidaregåande opplæring, kan lastast ned.

Del og bruk (Del det du har og bruk det du får). Oppretta av lærarar i vidaregåande skolar  
<http://delogbruk.ning.com/>

Det finst mange interessante bloggar oppretta av lærarar i vidaregåande skolar.

## 12 Skolar i Hordaland som deltok i *Betre vurderingspraksis*

Bergen Handelsgymnasium  
Fana gymnas  
Fyllingsdalen vidaregåande skole

## 13 Skolar som deltar i pilotprosjektet *Vurdering for læring*

Arna vidaregåande skule  
Austrheim vidaregåande skule  
Laksevåg vidaregåande skole  
Nørheimsund vidaregåande skule  
Øystese gymnas  
Årstad vidaregåande skole

## 14 Arbeidsgruppe – rettleiingsheftet

Brita Bøyum, Utdanningsforbundet  
Sigrid Hiller, Opplæringsavdelinga  
Oddbjørg Høgset, Opplæringsavdelinga  
Laila Kleppe, Opplæringsavdelinga  
Øyvind Oddekalv, U Pihl videregående skole  
Johnny Tobiassen, Bergen Katedralskole  
Anne Marie Ytrebø, Arna vidaregåande skule

## 15 Litteratur

Black, Paul og Dylan Thomas (2006): "Assessment for Learning in the Classroom". I "John Gardner (red): Assessment and Learning.

Black, Paul, Harrison, Christine, Lee, Clare, Marshall, Bethan og Thomas, Dylan (2004): "Working Inside the Black Box Assessment for Learning in the Classroom"

Dale, E. L., & Wærness, J. I. (2006): *Vurdering og læring i en elevaktiv skole*.

Dysthe, Olga (2008): "Klasseromsvurdering og læring." I *Bedre skole*, nr 4/09

Dysthe, Olga (2009): Fordrag på samling pilotprosjekt "Vurdering for læring" 20.10.09

Fjørtoft, H. (2009). *Effektiv planlegging og vurdering : rubrikker og andre verktøy for lærere*.

Hattie, John og og Helen Timperley (2007): "The power of feedback" I: *Review of Educational Research, Vol. 77, No. 1*.

Høihilderen, Eli (red.) (2009): *Elevvurdering. Metoder for ungdomstrinnet og videregående opplæring*

Kunnskapsdepartementet (2008): *Kvalitet i skolen*. St.meld. nr. 31. Oslo: Kunnskapsdepartementet.

Smith, Kari (2007) "Vurdering som et motivasjonsfremmende redskap for læring." I *Norsk Pedagogisk Tidsskrift* nr 2/07

Opplæringslova og forskrifter, 2009

Utdanningsdirektoratet (2009): Kunnskapsløftet – om fag- og timefordeling for grunnsopplæringen og tilbudsstrukturen i videregående opplæring. *Rundskriv Udir-08-2009*

## 16 Vedlegg

Forskrift til opplæringslova, Kapittel 3

## Kapittel 3. Individuell vurdering i grunnskolen og i vidaregåande opplæring

0 Heile kapittel 3 endra ved forskrift 1 juli 2009 nr. 964 (i kraft 1 aug 2009).

### I. Generelle føresegner

0 Heile kapittel 3 endra ved forskrift 1 juli 2009 nr. 964 (i kraft 1 aug 2009).

#### § 3-1. Rett til vurdering

Elevar i offentleg grunnskoleopplæring og elevar, lærlingar og lære kandidat ar i offentleg vidaregåande opplæring har rett til vurdering etter reglane i dette kapitlet. Retten til vurdering inneber både ein rett til undervegsvurdering og sluttvurdering og ein rett til dokumentasjon av opplæringa. Kapitlet gjeld for privatistar, så langt det er fastsett i føresegnene her. Praksiskandidatar reknast som privatistar i kapitlet her, dersom ikkje anna er særskild fastsett i føresegnene her. Kapitlet gjeld for elevar i skolar som er godkjende etter opplæringslova § 2-12.

Reglane i kapitlet gjeld ikkje for dei som får privat opplæring i heimen etter opplæringslova § 2-13.

Kapitlet gjeld heller ikkje for offentleg grunnskoleopplæring eller offentleg vidaregåande opplæring særskilt organisert for vaksne etter opplæringslova kapittel 4A. For vurdering i opplæring særskilt organisert for vaksne, gjeld kapittel 4.

Det skal vere kjent for eleven, lærlingen og lære kandidaten kva som er måla for opplæringa og kva som blir vektlagt i vurderinga av hennar eller hans kompetanse. Det skal og være kjent for eleven kva som er grunnlaget for vurdering og kva som blir vektlagt i vurdering i orden og åtferd.

Skoleeigar har ansvaret for at eleven, lærlingen eller lære kandidaten sin rett til vurdering blir oppfylt, jf. opplæringslova § 13-10 første ledd. Ved opplæring i bedrift er det lærebedrifta som oppfyller lærlingen og lære kandidaten sin rett til vurdering.

#### § 3-2. Formålet med vurdering

Formålet med vurdering i fag er å fremje læring undervegs og uttrykkje kompetansen til eleven, lærlingen og lære kandidaten undervegs og ved avslutninga av opplæringa i faget. Vurderinga skal gi god tilbakemelding og rettleiing til elevane, lærlingane og lære kandidatane.

Undervegsvurdering skal brukast som ein reiskap i læreprosessen, som grunnlag for tilpassa opplæring og bidra til at eleven, lærlingen eller lære kandidaten aukar kompetansen sin i fag.

Sluttvurderinga skal gi informasjon om kompetansen til eleven, lærlingen og lære kandidaten ved avslutninga av opplæringa i faget.

Formålet med vurdering i orden og i åtferd er å bidra i sosialisering prosessen til eleven, skape eit godt psykososialt miljø og gi informasjon om eleven sin orden og åtferd.

Undervegsvurdering og sluttvurdering skal sjåast i samanheng for å betre opplæringa. Kunnskap om elevens, lærlingens og lære kandidatens utvikling i fag, orden og åtferd gjennom undervegsvurdering gir læraren grunnlag for å fastsetje standpunktkarakter i fag, orden og åtferd.

#### § 3-3. Grunnlaget for vurdering i fag

Grunnlaget for vurdering i fag er dei samla kompetansemåla i læreplanane for fag slik dei er fastsette i læreplanverket, jf. § 1-1 eller § 1-3.

I vurderinga i fag skal ikkje føresetnadene til den enkelte, frávær, eller forhold knytte til ordenen og åtferda til eleven, lærlingen eller lærekandidaten trekkjast inn. I grunnskolen skal det i faget kroppsøving i vurderinga leggjast vekt på både oppnådd kompetanse og føresetnadene til eleven. I vidaregåande opplæring skal ikkje elevens føresetnader trekkjast inn i vurderinga i faget kroppsøving.

Eleven, lærlingen og lærekandidaten skal møte fram og delta aktivt i opplæringa slik at læraren og instruktøren får grunnlag til å vurdere eleven, lærlingen og lærekandidaten sin kompetanse i faget. Læraren og instruktøren skal leggje til rette for at han eller ho får eit tilstrekkeleg grunnlag for å vurdere kompetansen til eleven, lærlingen og lærekandidaten, slik at den retten eleven, lærlingen og lærekandidaten har etter § 3-1, blir oppfylt. Stort frávær eller andre særlege grunnar kan føre til at læraren ikkje har tilstrekkeleg grunnlag for å gi halvårsvurdering med karakter eller standpunktkarakter.

#### **§ 3-4. Karakterar i fag mv.**

I grunnskolen til og med 7. årstrinnet skal det berre givast vurdering utan karakterar.

Frå 8. årstrinn og i vidaregåande opplæring skal vurdering også givast med talkarakterar. Det skal brukast talkarakterar på ein skala frå 1 til 6. Berre heile talkarakterar skal brukast.

Dei enkelte karaktergradene har dette innhaldet:

- a) karakteren 6 uttrykkjer at eleven har framifrå kompetanse i faget
- b) karakteren 5 uttrykkjer at eleven har mykje god kompetanse i faget
- c) karakteren 4 uttrykkjer at eleven har god kompetanse i faget
- d) karakteren 3 uttrykkjer at eleven har nokså god kompetanse i faget
- e) karakteren 2 uttrykkjer at eleven har låg kompetanse i faget
- f) karakteren 1 uttrykkjer at eleven har svært låg kompetanse i faget.

I vidaregåande opplæring svarer bestått til karakterane 2 til 6. Departementet kan i spesielle tilfelle fastsetje ei anna grense for bestått i læreplanverket. Fag med karakteren 1 i standpunkt er bestått når eksamenskarakteren er 2 eller betre. Det gjeld ikkje dersom eksamenskarakteren er for ein tverrfagleg eksamen.

Det går fram av læreplanverket at det i enkelte fag skal brukast andre uttrykk enn talkarakterar. Dei andre uttrykka er

- a) bestått/ikkje bestått: for å få karakteren bestått skal eleven ha vist tilfredsstillande kompetanse i faget
- b) delteke/ikkje delteke.

Ved fag- og sveineprøve og kompetanseprøve skal det ved vurderinga brukast ein tredelt skala som har dette innhaldet:

- a) bestått mykje godt: mykje god eller framifrå kompetanse i faget
- b) bestått: tilfredsstillande eller god kompetanse i faget
- c) ikkje bestått: svært låg kompetanse i faget.

### **§ 3-5. Grunnlaget for vurdering i orden og i åtfærd**

Grunnlaget for vurdering i orden og i åtfærd er knytt til i kva grad eleven opptre i tråd med ordensreglementet til skolen.

Grunnlaget for vurdering i orden er knytt til om eleven er førebudd til opplæringa, og korleis arbeidsvanane og arbeidsinnsatsen til eleven er. Det inneber mellom anna om eleven er punktleg, følgjer opp arbeid som skal gjerast, og har med nødvendig læremiddel og utstyr.

Grunnlaget for vurdering i åtfærd er knytt til korleis eleven oppfører seg overfor medelevar, lærarar og andre tilsette i og utanfor opplæringa. Det inneber mellom anna om eleven viser omsyn og respekt for andre.

Vurderinga av orden og åtfærd skal haldast åtskild frå vurderinga av eleven sin kompetanse i fag.

I vurderinga i orden og i åtfærd skal det takast omsyn til føresetnadene eleven har. Til vanleg skal det ikkje leggast avgjerande vekt på enkelthendingar; unntaket er dersom enkelthendinga er særleg klanderverdig eller grov. Fråvæer kan føre til nedsett karakter i anten orden eller i åtfærd.

### **§ 3-6. Karakterar i orden og i åtfærd**

I grunnskolen skal det til og med 7. årstrinnet berre givast vurdering utan karakter i orden og i åtfærd.

Frå 8. årstrinnet og i vidaregåande opplæring skal vurdering i orden og i åtfærd givast med karakterar. I orden og i åtfærd skal då desse karakterane nyttast:

- a) God (G): vanleg god orden og vanleg god åtfærd
- b) Nokså god (Ng): klare avvik frå vanleg orden og frå vanleg åtfærd
- c) Lite god (Lg): i ekstraordinære tilfelle ved store avvik frå vanleg orden og frå vanleg åtfærd.

### **§ 3-7. Varsling**

Eleven og foreldra skal varslast skriftleg dersom det er tvil om eleven kan få halvårsvurdering med karakter eller standpunkt-karakter i eitt eller fleire fag fordi det ikkje er grunnlag for fastsetjing av karakter.

Eleven og foreldra skal også varslast skriftleg dersom det er fare for at eleven i halvårsvurdering med karakter eller i standpunkt-karakter kan få karakteren nokså god (Ng) eller lite god (Lg) i orden eller i åtfærd.

Varsalet skal givast utan ugrunna opphald. Varsalet skal gi eleven høve til å skaffe grunnlag for halvårsvurdering med karakter og standpunkt-karakter, eller gi eleven høve til å forbetre karakteren i orden eller åtfærd.

Etter at eleven har fylt 18 år, skal foreldra ikkje varslast.

### **§ 3-8. Dialog om anna utvikling**

Eleven, lærlingen og lære-kandidaten har rett til jamleg dialog med kontaktlæraren eller instruktøren om sin utvikling i lys av opplæringslova § 1-1, generell del og prinsipp for opplæringa i læreplanverket.

### **§ 3-9. Kontakt med heimen i grunnskolen**

Skolen skal halde kontakt med foreldra gjennom opplæringsåret.

Foreldra har minst to gonger i året rett til ein planlagd og strukturert samtale med kontaktlæraren om korleis eleven arbeider dagleg, og eleven sin kompetanse i faga. I tillegg skal kontaktlæraren samtale med foreldra om utviklinga til eleven i lys av opplæringslova § 1-1, generell del og prinsipp for opplæringa i læreplanverket. Samtalen skal klargjere korleis eleven, skolen og foreldra skal samarbeide for å leggje til rette for læringa og utviklinga til eleven. Eleven kan vere med i samtalen med foreldra. Når eleven har fylt 12 år, har han eller ho rett til å vere med i samtalen. Det skal alltid sendast skriftleg melding når foreldra ikkje møter til samtale.

Når skolen eller heimen meiner det er formålstenleg, kan skriftleg melding nyttast i tillegg.

### **§ 3-10. Privatistar**

Privatist er etter reglane i dette kapitlet ein som har meldt seg til eksamen i eitt eller fleire fag utan å vere elev eller lærling i dette faget eller desse faga.

Privatistar går opp til eksamen i fag dei ønskjer å dokumentere kompetanse i. Eksamensforma for privatistar er fastsett i læreplanverket.

Det skal vere tilgjengeleg for privatistar kva som er måla for opplæringa og kva som blir lagt vekt på i vurderinga av hennar eller hans kompetanse.

I læreplanverket er det for enkelte fag fastsett at privatistar berre treng bestå eksamen på det høgaste nivået for å få godskrive faget på eit lågare nivå.

Barn og ungdom i opplæringspliktig alder, jf. opplæringslova § 2-1, kan ikkje ta grunnskoleopplæringa som privatist.

## **II. Undervegsvurdering**

0 Helle kapittel 3 endra ved forskrift 1 juli 2009 nr. 964 (i kraft 1 aug 2009).

### **§ 3-11. Undervegsvurdering**

Undervegsvurdering skal brukast som ein reiskap i læreprosessen, som grunnlag for tilpassa opplæring og bidra til at eleven, lærlingen og lære kandidaten aukar kompetansen sin i fag, jf. § 3-2. Undervegsvurderinga skal gis løpande og systematisk og kan vere både munnleg og skriftleg.

Undervegsvurderinga skal innehalde grunngitt informasjon om kompetansen til eleven, lærlingen og lære kandidaten og skal givast som meldingar med sikte på fagleg utvikling.

Eleven, lærlingen og lære kandidaten har minst ein gong kvart halvår rett til ein samtale med kontaktlæraren eller instruktøren om sin utvikling i forhold til kompetansemåla i faga. Samtalen kan gjennomførast i samband med halvårsvurderinga utan karakter, jf. § 3-13 og i grunnskolen i samband med samtalen med foreldra etter § 3-9.

Læraren skal vurdere om eleven har tilfredsstillande utbytte av opplæringa, jf. opplæringslova § 5-1 og § 5-4.

Lære kandidatar og elevar med individuell opplæringsplan skal både ha undervegsvurdering og rettleiing i samsvar med den opplæringsplanen som er utarbeidd for dei, jf. opplæringslova § 5-5 første ledd. Elevar som er fritekne frå vurdering med karakter etter § 3-20 skal ha undervegsvurdering utan karakter på grunnlag av måla i den individuelle opplæringsplanen så langt planen avvik frå læreplanen for faget.

Elevar som er fritekne frå vurdering med karakter etter § 3-21 til § 3-24 skal ha undervegsvurdering utan karakter i faget. Grunnlaget for vurdering er kompetansemåla i faget, jf. § 3-3.

### **§ 3-12. *Eigenvurdering***

Eigenvurderinga til eleven, lærlingen og lærekandidaten er ein del av undervegsvurderinga. Eleven, lærlingen og lærekandidaten skal delta aktivt i vurderinga av eige arbeid, eigen kompetanse og eiga fagleg utvikling, jf. opplæringslova § 2-3 og § 3-4.

### **§ 3-13. *Halvårsvurdering i fag for elevar***

Halvårsvurdering i fag er ein del av undervegsvurderinga og skal syne kompetansen til eleven i forhold til kompetansemåla i læreplanverket. Ho skal også gi rettleiing om korleis eleven kan auke kompetansen sin i faget.

Det skal bli gitt halvårsvurdering utan karakter gjennom heile grunnopplæringa.

Frå 8. årstrinnet skal eleven ha halvårsvurdering utan karakter og halvårsvurdering med karakter. Halvårsvurderinga med karakter skal gi uttrykk for den kompetansen eleven har nådd ut frå det som er forventa på tidspunktet for vurderinga.

I grunnskolen skal halvårsvurderinga gjennomførast midt i opplæringsperioden på 8., 9. og 10. årstrinnet, og ved slutten av opplæringsåret på årstrinnet for fag som ikkje blir avslutta, jf. læreplanverket.

I vidaregåande opplæring skal halvårsvurdering gjennomførast midt i opplæringsperioden på kvart årstrinn. I fellesfag, jf. § 3-45, skal elevane også ha halvårsvurdering med karakter på slutten av opplæringsåret dersom faget ikkje blir avslutta, jf. læreplanverket.

Elevar som er fritekne frå vurdering med karakter etter § 3-20 til § 3-24 skal ha halvårsvurdering utan karakter. For elevar med fritak frå vurdering med karakter etter § 3-20 skal halvårsvurderinga utan karakter givast på grunnlag av måla i den individuelle opplæringsplanen så langt denne avvik frå læreplanen for faget.

Rektor har ansvaret for at faglæraren gjennomfører halvårsvurdering med og utan karakter. Dersom rektor er i tvil om reglane for halvårsvurdering er følgde, kan rektor be om ny fagleg vurdering før karakterane blir fastsette.

### **§ 3-14. *Halvårsvurdering for lærlingar og lærekandidatar i bedrift***

Halvårsvurdering er ein del av undervegsvurderinga for lærlingar og lærekandidatar. Halvårsvurderinga er utan karakter og skal beskrive kompetansen til lærlingen og lærekandidaten i forhold til kompetansemåla i læreplanverket. Ho skal også gi rettleiing om korleis lærlingen og lærekandidaten kan auke kompetansen sin i faget. Instruktøren gjennomfører halvårsvurderinga utan karakter.

### **§ 3-15. *Halvårsvurdering i orden og i åtferd for elevar***

Halvårsvurdering i orden og i åtferd er ein del av undervegsvurderinga. Det skal givast halvårsvurdering utan karakter i orden og i åtferd i heile opplæringsløpet.

Frå 8. årstrinnet skal det givast halvårsvurdering også med karakter i orden og i åtferd. Halvårsvurdering med karakter skal fastsetjast midt i opplæringsperioden på 8., 9. og 10. årstrinnet og ved slutten av opplæringsåret så nær som etter 10. årstrinnet.

I vidaregåande opplæring i skole skal det givast halvårsvurdering med karakter midt i opplæringsperioden på kvart årstrinn. Det skal givast halvårsvurdering med karakter ved slutten av opplæringsåret dersom eleven ikkje avsluttar opplæringa i skole dette opplæringsåret. Når eleven avsluttar opplæringa i skole skal det fastsetjast standpunktkarakter i orden og i åtfærd etter § 3-19.

Kontaktlæraren skal gi halvårsvurdering i orden og i åtfærd i samarbeid med dei andre lærarane til eleven.

### **§ 3-16. Kravet til dokumentering av undervegsvurderinga**

Frå 8. årstrinnet skal alle elevar kvart halvår få halvårsvurdering med karakter i fag og i orden og i åtfærd dokumentert skriftleg. Fråvær skal også dokumenterast kvart halvår.

Det skal kunne dokumenterast at undervegsvurdering er gitt, jf. § 3-11 til § 3-15.

## **III. Sluttvurdering**

0 Heile kapittel 3 endra ved forskrift 1 juli 2009 nr. 964 (i kraft 1 aug 2009).

### **§ 3-17. Sluttvurdering i fag**

Sluttvurderinga skal gi informasjon om kompetansen til eleven, lærlingen og lærekandidaten ved avslutninga av opplæringa i fag i læreplanverket, jf. § 3-3.

Sluttvurderingar i grunnskolen er standpunktkarakterar og eksamenskarakterar.

Sluttvurderingar i vidaregåande opplæring er standpunktkarakterar, eksamenskarakterar og karakterar til fag-/sveineprøve og kompetanseprøve.

Sluttvurderingar er enkeltvedtak og kan påklagast etter reglane i kapittel 5.

Eksamen er særskilt regulert i § 3-25 til § 3-37. For fag-/sveineprøva og kompetanseprøva gjeld særskilde reglar, sjå § 3-48 til § 3-68.

Elevar i grunnopplæringa som har individuell opplæringsplan, skal vurderast etter dei samla kompetansemåla i læreplanen for faget, jf. § 3-3. Elevar i grunnskolen kan få fritak frå vurdering med karakter, jf. § 3-20. Dersom sluttvurdering ikkje er mogleg for ein elev i vidaregåande opplæring, skal eleven ha dokumentasjon ført i samsvar med § 3-45 og § 3-46.

### **§ 3-18. Standpunktkarakterar i fag**

Standpunktkarakterar er karakterar som blir gitt ved avslutninga av opplæringa i fag, jf. læreplanverket, og som skal førast på vitnemålet.

Standpunktkarakteren må baserast på eit breitt vurderingsgrunnlag som samla viser kompetansen eleven har i faget, jf. § 3-3. Eleven skal ha høve til å forbetre kompetansen sin i faget inntil standpunktkarakteren er fastsett. Eleven skal bli gjort kjend med kva det er lagt vekt på i fastsetjinga av hennar eller hans standpunktkarakter.

Standpunktkarakterar i fag med sentralt gitt eksamen skal fastsetjast seinast dagen før fellessensurmøtet.

Standpunktkarakterar i fag med lokalt gitt eksamen skal fastsetjast seinast dagen før skolen gjennomfører den første lokalt gitte eksamenen på det aktuelle trinnet innanfor utdanningsprogrammet.

Rektor har ansvaret for at faglærer set standpunktkarakter. Dersom rektor er i tvil om reglane for fastsetjing av standpunktkarakter er følgde, kan rektor krevje ei ny fagleg vurdering før karakterane blir fastsette og førte.

I dei tilfella der det ikkje er grunnlag for å setje standpunktkarakter, har rektor ansvaret for at det blir fatta enkeltvedtak om at standpunktkarakter ikkje skal bli gitt. For at det skal kunne gjerast enkeltvedtak om å ikkje gi karakter, skal eleven vere varsla, jf. § 3-7. Når det ikkje kan givast standpunktkarakter i grunnskolen på grunn av stort fråvær eller andre særlege grunnar, skal det ikkje førast karakter på vitnemålet.

#### **§ 3-19. Standpunktkarakterar i orden og i åtfærd**

Elevar skal ha standpunktkarakterar i orden og i åtfærd etter 10. årstrinnet. I vidaregåande opplæring skal elevar ha standpunktkarakter når dei avsluttar opplæringa i skole, jf. læreplanverket.

Rektor har ansvaret for at standpunktkarakterar i orden og i åtfærd blir fastsette etter drøfting i møte der lærarane til eleven er til stades. Endelege karakterar i orden og i åtfærd skal fastsetjast etter at opplæringa er avslutta.

#### **IV. Fritak frå vurdering**

0 Heile kapittel 3 endra ved forskrift 1 juli 2009 nr. 964 (i kraft 1 aug 2009).

#### **§ 3-20. Fritak frå vurdering med karakter for elevar med individuell opplæringsplan**

Når ein elev i grunnskolen får opplæring etter individuell opplæringsplan, avgjer foreldra om eleven skal ha vurdering med eller utan karakter. I fag der det både gis skriftlege og munnlege karakter, kan foreldra også velje om eleven skal ha berre skriftleg eller munnleg karakter i faget. Dei som vel karakter i norsk skriftleg, kan velje karakter i den eine eller begge målformene. Valretten gjeld berre i fag som er omfatta av enkeltvedtaket om spesialundervisning der eleven får opplæring etter slik plan.

Skoleeigaren skal sørge for at eleven og foreldra i grunnskolen får nødvendig rettleiing om kva val av vurdering utan og med karakter inneber for eleven.

Elevar i vidaregåande opplæring kan ikkje få fritak frå vurdering med karakter sjølv om dei har individuell opplæringsplan i eit fag.

#### **§ 3-21. Fritak frå vurdering med karakter for minoritetsspråklege elevar i grunnskolen**

Minoritetsspråklege elevar i grunnskolen som begynner opplæringa i Noreg siste halvdel av eit opplæringsår, er fritakne frå vurdering med karakterar i fag dette opplæringsåret, dersom foreldra ber om dette. Dette gjeld både halvårsvurdering med karakter og standpunktvurdering.

Skoleeigaren skal sørge for at eleven og foreldra i grunnskolen får nødvendig rettleiing om kva val av vurdering utan og med karakter inneber for eleven.

#### **§ 3-22. Fritak frå vurdering med karakter i skriftleg sidemål**

Elevar som har hatt rett til særskild språkopplæring på 8., 9. eller 10. årstrinn i grunnskolen eller på Vg1, Vg2 eller Vg3 i vidaregåande opplæring, kan få fritak frå vurdering med karakter i skriftleg sidemål.

Når ein elev i grunnskolen og vidaregåande opplæring får opplæring etter individuell opplæringsplan, avgjer foreldra eller eleven om eleven skal ha vurdering

med karakter i skriftleg sidemål. Valretten gjeld berre dersom enkeltvedtaket om spesialundervisning omfattar skriftleg sidemål.

Elevar i heile grunnopplæringa og privatistar i vidaregåande opplæring har også rett til fritak frå vurdering med karakter i skriftleg sidemål dersom dei:

- a) på grunn av sjukdom, skade eller dysfunksjon som er diagnostisert av ein sakkunnig, har problem med å greie begge målforma
- b) ikkje har gjennomgått ungdomstrinnet i norsk grunnskole
- c) fylte vilkåra for fritak frå opplæring eller vurdering i skriftleg sidemål i grunnskolen, men på grunn av dokumentert saksbehandlingsfeil likevel ikkje fekk fritak.

Skoleeigaren skal stryke standpunktkarakter eller eksamenskarakter i skriftleg sidemål dersom en elev eller privatist som har fått innvilga fritak frå vurdering med karakter etter denne føresegna, likevel har fått vurdering i skriftleg sidemål.

### **§ 3-23. Fritak frå vurdering med karakter i den praktiske delen av faget kroppsøving i vidaregåande opplæring**

Elevar i vidaregåande opplæring som ikkje kan følgje den ordinære opplæringa i den praktiske delen av kompetansemåla i kroppsøvingfaget, skal få tilrettelagd opplæring så langt dette er mogleg for eleven. Elevar skal få fritak frå vurdering med karakter i den praktiske delen av faget når den tilrettelagde opplæringa eleven får ikkje kan vurderast med karakter. Det blir ikkje gitt fritak frå vurdering med karakter i den teoretiske delen av faget.

### **§ 3-24. Fritak frå eksamen**

Elevar som er fritekne for vurdering med karakter i fag som blir avslutta med eksamen, skal ikkje delta i eksamen i faget.

I grunnskolen kan rektor sjølv etter søknad frå foreldra frita elevar frå eksamen, når det ligg føre tungtvegande grunnar.

## **V. Eksamen**

0 Heile kapittel 3 endra ved forskrift 1 juli 2009 nr. 964 (i kraft 1 aug 2009).

### **§ 3-25. Generelle føresegner**

Eksamen skal vere i samsvar med læreplanverket.

Læreplanen i det enkelte faget fastset om og eventuelt når i opplæringsløpet det skal vere eksamen i faget. Det er òg fastsett i læreplanen for fag om eleven skal opp til eksamen i faget, eller om elevar kan trekkjast ut, kva slags eksamensform som skal nyttast, og om eksamen skal vere lokalt gitt eller sentralt gitt. Departementet fastset kor mange eksamenar det skal vere på 10. årstrinnet og på kvart årstrinn innanfor utdanningsprogramma eller programområda i vidaregåande opplæring.

Eksamen skal organiserast slik at eleven eller privatisten kan få vist kompetansen sin i faget. Eksamenskarakteren skal fastsetjast på individuelt grunnlag og gi uttrykk for kompetansen til eleven eller privatisten slik denne kjem fram på eksamen.

Fylkeskommunen har plikt til å informere elevar og privatistar i vidaregåande opplæring om kva for reglar som gjeld for ny eksamen, utsett eksamen og særskild eksamen.

Det er ikkje ny eksamen, utsett eksamen eller særskild eksamen i grunnskolen.

For fag- og sveineprøva og kompetanseprøva gjeld reglane i § 3-48 til § 3-68.

### **§ 3-26. Melding av elevar til eksamen**

Skolen melder til eksamen alle elevar som tek del i opplæringa i fag som blir avslutta med eksamen. Utdanningsdirektoratet fastset meldingsfristar og korleis melding til eksamen skal gå føre seg.

Elevar i vidaregåande opplæring må sjølve melde seg til ny eksamen, utsett eksamen og særskild eksamen, jf. § 3-33 til § 3-35. Meldinga skjer til skolen.

### **§ 3-27. Melding av privatistar til eksamen i vidaregåande opplæring**

Privatistar har sjølve ansvaret for å melde seg til eksamen til den skolen eller den instansen som fylkeskommunen fastset. Utdanningsdirektoratet fastset meldingsfristar og korleis eksamen skal gå føre seg. Skolen eller den instansen som fylkeskommunen peikar ut, avgjer om meldinga kan godkjennast.

Ein privatist kan ikkje melde seg til eksamen i det same faget fleire stader ved same eksamen.

Den som er elev i eit fag ved fristen for melding til privatisteksamen, kan ikkje melde seg som privatist i faget til denne eksamenen. Heiltidselevar kan ikkje utan å endre elevstatusen sin, jf. § 6-2, melde seg av eit fag for å ta faget som privatist.

Privatistar må betale prøveavgifta i samsvar med fastsette satsar. Dette gjeld ikkje for utsett eksamen etter § 3-35 og ny eksamen etter § 3-36 og § 3-37.

### **§ 3-28. Sentralt gitt eksamen**

Ved sentralt gitt eksamen fastset Utdanningsdirektoratet korleis eksamen i det enkelte faget skal organiserast, korleis eksamensoppgåva skal vere, datoen for den enkelte eksamenen, og korleis sensurordningane skal vere.

Kommunen har ansvaret for å trekkje fag og elevar til sentralt gitt eksamen i grunnskolen og for den praktiske gjennomføringa av eksamen.

Fylkeskommunen har ansvaret for å trekkje fag og elevar til eksamen og for den praktiske gjennomføringa av eksamenen for elevar og privatistar i vidaregåande opplæring.

Eleven skal få vite kva fag han eller ho skal prøvast i, 48 timar før sjølve eksamen. Laurdagar, søndagar, høgtidsdagar og heilagdagar skal ikkje reknast med. Utdanningsdirektoratet fastset dato for melding om trekkfag.

Prøvesvara ved sentralt gitt eksamen skal vurderast av to eksterne sensorar. Dersom det er usemje, skal karakteren avgjerast av ein oppmann.

### **§ 3-29. Lokalt gitt eksamen i grunnskolen**

Kommunen har ansvaret for gjennomføringa av alle lokale eksamenar. Faglæraren har plikt til å utarbeide forslag til eksamensoppgåver.

Eleven skal få vite kva fag han eller ho skal prøvast i, 48 timar før sjølve eksamen. Laurdagar, søndagar, høgtidsdagar og heilagdagar skal ikkje reknast med.

Eksamen kan organiserast i to delar, der den første delen er ei førebuing og den andre delen er sjølve eksamen. Førebuingdelen kan vere på inntil 2 dagar og skal normalt ikkje inngå i vurderingsgrunnlaget.

Ramma for eksamen på eksamensdagen skal vere munnleg eksamen på inntil 30 minutt per elev.

Prøvesvara ved lokalt gitt eksamen skal vurderast av to sensorar. Éin av sensorane skal vere ekstern. Den andre sensoren kan vere faglæraren til eleven. Faglæraren har plikt til å delta i vurderinga som sensor. Dersom det er usemje om karakteren, avgjer den eksterne sensoren.

Ved eksamen som krev eksaminator, skal den eine sensoren vere eksaminator. Eksamineringa skal gi elevane høve til å syne kompetanse i så stor del av faget som mogleg. Dersom det er usemje om kva eleven skal prøvast i, er det den eksterne sensoren som avgjer.

### **§ 3-30. Lokalt gitt eksamen i vidaregåande opplæring**

Fylkeskommunen har ansvaret for gjennomføringa av alle lokalt gitte eksamenar. Faglæraren har plikt til å utarbeide forslag til eksamensoppgåver.

Eleven skal få vite kva fag han eller ho skal prøvast i, 48 timar før sjølve eksamen. Laurdagar, søndagar, høgtidsdagar og heilagdagar skal ikkje reknast med.

Eksamen kan organiserast i to delar der den første delen er ei førebuing og den andre er sjølve eksamen. Førebuingdelen kan vere på inntil 2 dagar og skal normalt ikkje inngå i vurderingsgrunnlaget.

Rammene for eksamenen på eksamensdagen skal vere:

- a) skriftleg eksamen - inntil 5 timar
- b) munnleg eksamen - inntil 30 minutt per elev eller privatist
- c) munnleg-praktisk eksamen - inntil 45 minutt per elev eller privatist
- d) praktisk eksamen - inntil 5 timar.

Prøvesvara ved lokalt gitt eksamen skal vurderast av to sensorar. Den eine sensoren skal vere ekstern. Den andre sensoren kan vere faglæraren til eleven. Faglæraren har plikt til å delta i vurderinga som sensor. Dersom det er usemje om karakteren, avgjer den eksterne sensoren. Som sensor ved lokalt gitt eksamen i programfag i yrkesfaglege utdanningsprogram kan det også oppnemnast ein fagarbeidar med praksis frå arbeidslivet.

Ved eksamen som krev eksaminator, skal den eine sensoren vere eksaminator. Eksamineringa skal gi elevane høve til å syne kompetanse i så stor del av faget som mogleg. Dersom det er usemje om kva eleven skal prøvast i, er det den eksterne sensoren som avgjer.

### **§ 3-31. Hjelpemiddel til eksamen**

Eksamenen kan organiserast med eller utan hjelpemiddel. Utdanningsdirektoratet fastset kva for hjelpemiddel som er tillatne i kvart fag ved sentralt gitt eksamen.

Ved lokalt gitt eksamen fastset skoleeigaren kva hjelpemiddel som skal tillatast. Dei tillatne hjelpemidla må ikkje svekkje grunnlaget for å vurdere kompetansen til eleven eller privatisten.

### **§ 3-32. Særskild tilrettelegging av eksamen**

Elevar og privatistar med behov for særskild tilrettelegging skal kunne få lagt forholda til rette slik at dei kan få vist kompetansen sin ut frå kompetansemåla i fag i læreplanverket. Tiltaka må vere tilpassa behova til eleven og privatisten så langt råd er.

Tiltaka må ikkje føre til at eleven eller privatisten får fordelar framfor andre som ikkje får tilrettelegging ved eksamen. Tilrettelegginga må heller ikkje vere så omfattande at eleven eller privatisten ikkje blir prøvd i kompetansemåla i fag i læreplanverket. Der det i kompetansemåla er kravd skriftlege, munnlege eller praktiske ferdigheiter, er det ikkje høve til å leggje til rette eksamen slik at desse ferdigheitene ikkje blir prøvde, når slik prøving er fastsett i eksamensforma for faget.

Rektor avgjer etter søknad kva for ordningar som skal nyttast for elevar. Avgjerda til rektor er eit enkeltvedtak som kan påklagast til fylkesmannen. Rektor kan krevje uttale frå ein sakkunnig instans. Særskild tilrettelegging av eksamen krev ikkje vedtak om spesialundervisning.

Privatistar må leggje fram ein sakkunnig uttale. Fylkeskommunen avgjer kva slags ordningar for tilrettelegging som skal nyttast. Avgjerda til fylkeskommunen er eit enkeltvedtak som kan påklagast til fylkesmannen.

### **§ 3-33. Særskild eksamen for elevar i vidaregåande opplæring**

Ein elev som får karakteren 1 i standpunktkarakter i eit fag, har rett til særskild eksamen i faget dersom han eller ho ikkje er trekt ut til eksamen i faget. Det gjeld òg for fag der det ikkje blir halde eksamen ordinært.

Særskild eksamen blir normalt halden samtidig med utsett og ny eksamen.

### **§ 3-34. Ny eksamen for elevar i vidaregåande opplæring**

Ein elev som får karakteren 1 ved ordinær eksamen, har rett til ny eksamen i faget ved første etterfølgjande eksamen. Eleven beheld då standpunktkarakteren i faget.

Dersom eleven ikkje går opp til første etterfølgjande eksamen, må han eller ho ta faget som privatist, og standpunktvurderinga i faget fell bort.

### **§ 3-35. Utsett eksamen for elevar og privatistar i vidaregåande opplæring**

Ein elev eller privatist som har dokumentert fråvær ved ordinær eksamen og særskild eksamen, eller ein elev som har dokumentert fråvær ved ny eksamen, har rett til å framstille seg til første etterfølgjande eksamen. Eleven beheld standpunktkarakteren i faget.

Dersom eleven ikkje går opp til første etterfølgjande eksamen, må han eller ho ta faget som privatist, og eventuell standpunktvurdering i faget fell bort.

Fråvær frå eksamen blir rekna som dokumentert når eleven eller privatisten er hindra frå å møte til eksamen, hindringa er uføreseieleg og han eller ho elles ikkje kan lastast for hindringa. Eleven eller privatisten må leggje fram dokumentasjon på dette.

Dersom ein elev har rett til utsett eksamen i trekkfag, skal trekkinga av fag gjerast på ny.

### **§ 3-36. Bortvising frå eksamen**

Elevar og privatistar skal ikkje hindre eller forstyrre gjennomføringa av eksamenen. Dersom åtferda til ein elev eller ein privatist er i strid med denne føresegna, kan eleven eller privatisten, etter å ha blitt åtvare, visast bort. Bortvising skal avgjerast av rektor sjølv og er eit enkeltvedtak som kan påklagast til fylkesmannen. Eleven eller privatisten skal ha høve til å uttale seg munnleg for rektor før rektor eventuelt fattar enkeltvedtaket om bortvising.

Dersom ein elev i vidaregåande opplæring eller ein privatist får medhald i klagen, har han eller ho rett til ny eksamen ved første etterfølgjande eksamen.

### **§ 3-37. Annullering av eksamen**

Dersom det er gjort formelle feil ved avviklinga av eksamen, eller dersom eksamen av anna årsak ikkje er avvikla i samsvar med føresegnene, kan Utdanningsdirektoratet annullere eksamen.

Dersom ein elev har vore oppe til eksamen i eit fag der han eller ho ikkje får standpunktkarakter, blir eksamen annullert.

Elevar og privatistar i vidaregåande opplæring som har fått eksamenen sin annullert av Utdanningsdirektoratet, har rett til å gå opp til ny eksamen ved første etterfølgjande eksamen. Utdanningsdirektoratet kan òg gi dispensasjon frå krava til vitnemål i § 3-42 dersom omsynet til elevane tilseier det.

Eksamen i eit fag kan annullerast dersom eleven eller privatisten har fuska eller forsøkt å fuske ved eksamen. Dette gjeld også dersom det er sensorane som oppdagar fusk eller forsøk på fusk. Spørsmålet om annullering av eksamen i faget skal avgjerast av rektor sjølv for elevar. Eleven skal ha høve til å uttale seg munnleg før rektor fattar enkeltvedtak om annullering av eksamen. For privatistar avgjerast spørsmålet av fylkeskommunen. Privatistar skal ha høve til å uttale seg munnleg for fylkeskommunen før enkeltvedtak om annullering av eksamen blir fatta. Eleven eller privatisten har likevel rett til å fullføre eksamen på eksamensdagen. Enkeltvedtak om annullering av eksamen kan påklagast til Fylkesmannen.

For elevar som får eksamen annullert på grunn av fusk eller forsøk på fusk, fell standpunktkarakteren bort.

Dersom eksamen i vidaregåande opplæring blir annullert på grunn av fusk eller forsøk på fusk, kan kandidaten gå opp til eksamen i faget som privatist, tidlegast eitt år etter den annullerte eksamenen.

## **VI. Dokumentasjon**

0 Heile kapittel 3 endra ved forskrift 1 juli 2009 nr. 964 (i kraft 1 aug 2009).

### **§ 3-38. Rett til dokumentasjon**

Alle som har fullført grunnopplæringa, har rett til å få opplæringa dokumentert. Elevar som har gått gjennom delar av opplæringa, har krav på å få denne dokumentert.

Utdanningsdirektoratet fastset dei formulara som skal nyttast.

Privatistar, inkludert praksiskandidatar, som har vore oppe til eksamen eller fag- eller sveineprøve, har rett til å få dette dokumentert.

Elevar og privatistar i vidaregåande opplæring som oppnår ny(e) karakter(ar) i fag eller tek nye fag, har rett til ny dokumentasjon.

Dersom dokumentasjonen går tapt, skal det skrivast ut ny dokumentasjon som er så identisk som råd er, men dokumentasjonen skal ikkje tilbakedaterast.

### **§ 3-39. Forsvarleg system for føring av karakterar og fråvær**

Skoleeigar skal ha eit forsvarleg system for føring av karakterar og fråvær, jf. opplæringslova § 13-10 første ledd.

Fråvær, halvårsvurdering med karakterar, standpunktkarakterar, eksamenskarakterar og karakterar til fag- og sveineprøva og kompetanseprøva skal først inn i systemet skoleeigar bruker. Dette gjeld både karakterar i fag og karakterar i orden og åtfærd. Karakterane er fastsette når karakterane er førte inn.

Halvårsvurdering med karakter kan ikkje endrast etter at dei er gitt. Standpunktkarakterar og eksamenskarakterar kan endrast etter klage. Føringsfeil skal rettast og attesterast av rektor.

Elevlar som blir fritekne for opplæringsplikt etter opplæringslova § 2-1 fjerde ledd, skal framleis stå oppførte i systemet for føring av karakterar.

#### Særskild om retten til dokumentasjon av grunnskoleopplæringa

0 Heile kapittel 3 endra ved forskrift 1 juli 2009 nr. 964 (i kraft 1 aug 2009).

### § 3-40. Vitnemål i grunnskolen

Alle elevlar skal ha vitnemål når dei fullfører grunnskoleopplæringa. Vitnemålet til eleven skal innehalde standpunktkarakterar, eksamenskarakterar og fråvær.

Elevlar med samisk i fagkrinsen skal ha vitnemål med norsk og samisk tekst.

Elevlar i skole for spesialundervisning og elevlar i fengselsundervisning skal få vitnemål frå ein naboskole eller skolen på heimstaden når eleven eller foreldra ber om det. Skoleeigaren i bustadkommunen til eleven skal opplyse om denne retten.

For elevlar som ikkje har fått standpunktkarakter i eitt fag fordi grunnlaget for vurdering manglar, skal det ikkje først karakter i faget på vitnemålet. Det skal då først på vitnemålet at vurdering ikkje var mogleg. Siste halvårsvurdering med karakter skal ikkje først som standpunktkarakter.

Elevlar som har hatt individuell opplæringsplan, skal få dette ført på vitnemålet dersom eleven eller foreldra ønskjer det.

Elevlar som er heilt eller delvis fritekne for vurdering med karakterar, skal ha vitnemål som viser at eleven har fullført grunnskoleopplæringa.

### § 3-41. Føring av fråvær i grunnskolen

Frå og med 8. årstrinnet skal alt fråvær først på vitnemålet. Fråvær skal først i dagar og enkelttimar.

Eleven eller foreldra kan krevje at årsaka til fråværet blir ført på eit vedlegg til vitnemålet. Dette gjeld berre når eleven har lagt fram dokumentasjon på årsaka til fråværet.

Dersom det er mogleg, skal eleven leggje fram dokumentasjon av fråværet frå opplæringa på førehand.

For inntil 14 skoledagar i eit opplæringsår, kan eleven krevje at følgjande fråvær ikkje vert ført på vitnemålet:

- a) dokumentert fråvær som skyldast helsegrunnar
- b) innvilga permisjon etter opplæringslova § 2-11.

#### Særskilt om retten til dokumentasjon av vidaregåande opplæring

0 Heile kapittel 3 endra ved forskrift 1 juli 2009 nr. 964 (i kraft 1 aug 2009).

### § 3-42. Vitnemål i vidaregåande opplæring

Vitnemål blir gitt som dokumentasjon for bestått opplæringsløp som gir studie- og/eller yrkeskompetanse. Elevar som har samisk i fagkrinsen, skal ha vitnemål med norsk og samisk tekst.

For å få vitnemål må alle fag og eksamenar som skal stå på vitnemålet i samsvar med læreplanverket, vere bestått, med mindre det kan gjerast unntak frå dette kravet med heimel i § 1-11 til § 1-13, § 3-20 til § 3-23, § 3-44 og § 23-1.

Vitnemål for elevar skal skrivast ut av skolen der eleven fullfører og består opplæringa. Nytt vitnemål skal skrivast ut av den skolen som skreiv ut det opphavlege vitnemålet. Fylkeskommunen er ansvarleg for å skrive ut vitnemål til lærlingar og privatistar som ikkje tidlegare har fått vitnemål. For privatistar som tidlegare har fått vitnemål som elev, skal skolen som skreiv ut det opphavlege vitnemålet, også skrive ut nye vitnemål for han eller henne.

### **§ 3-43. Førstegongsvitnemål**

Førstegongsvitnemål, jf. § 7-2 i forskrift 31. januar 2007 nr. 173 om opptak til høgare utdanning, blir gitt til den som ved utløpet av normal tid i tråd med fastsett opplæringsløp i læreplanverket, har bestått vidaregåande opplæring som gir generell studiekompetanse. Det er mogleg å føre karakterar som er oppnådde etter normal tid ved særskild eksamen etter § 3-33, utsett eksamen etter § 3-35 og ny eksamen etter § 3-36 eller § 3-37 på førstegongsvitnemålet.

Førstegongsvitnemål kan berre skrivast ut éin gong til den personen det gjeld. Det gjeld likevel ikkje dersom vedkommande får endra karakter(ar) på grunnlag av klage.

Elevane kan få ført på førstegongsvitnemålet karakterar som er forbetra innan utløpet av normal tid. Det er mogleg å få ført på karakterar i fag som går utover minstekravet til studiekompetanse, og som er oppnådde innan utløpet av normal tid.

Kravet om gjennomført vidaregåande opplæring på normal tid kan etter søknad bli utvida til maksimalt fem år. Dette gjeld dersom det blir lagt fram skriftleg dokumentasjon på at eleven har vore fråverande frå opplæringa ein lengre periode i løpet av eit opplæringsår på grunn av eitt eller fleire av desse forholda:

- a) vedkommande innanfor denne perioden gjennomfører internasjonal utveksling som medfører tap av opplæringstid
- b) vedkommande innanfor denne perioden gjennomfører folkehøgskole, verneplikt eller i minst seks månader av opplæringsåret utfører omsorgsarbeid
- c) vedkommande har hatt fråvær på grunn av langvarig sjukdom
- d) vedkommande har innanfor denne perioden fått innvilga søknad om omval etter opplæringslova § 3-1 fjerde ledd
- e) vedkommande har fått rett til ekstra opplæringstid etter reglane i opplæringslova § 3-1 femte ledd.

Føresegna gjeld og for elevar som hausten 2009 eller tidlegare er tekne inn til vidaregåande opplæring etter læreplanverket over fire år i en kombinasjon med ordinær treårig vidaregåande opplæring og idrettsutøving.

### **§ 3-44. Unntak for elevar og lærlingar frå vilkåra for å få vitnemål i yrkesfaglege utdanningsprogram**

Elevar og lærlingar i yrkesfaglege utdanningsprogram som har følgd opplæringa, men ikkje bestått i inntil to av fellesfaga som inngår i fag- og timefordelinga for

opplæringa, kan likevel i særskilde tilfelle få utferda vitnemål som gir yrkeskompetanse, men ikkje vitnemål som gir generell studiekompetanse. Samtykke til slikt unntak kan bli gitt etter søknad når eleven eller lærlingen

- a) har vore friteken for vurdering med karakter i faget/faga i grunnskolen
- b) har vore friteken for vurdering med karakter i faget/faga i den vidaregåande skolen
- c) har spesifikke lærevanskar, t.d. store lese- og skrivevanskar eller store matematikkvanskar. Slike vanskar kan også vurderast etter at standpunktkarakter er sett eller eksamen har vore gjennomført.

I dei yrkesfaga der det er knytt offentleg nasjonal eller internasjonal sertifisering til eit utferda vitnemål, kan det ikkje gjerast unntak i strid med slike sertifiseringsføresegner.

Før søknader om unntak kan bli behandla, skal det liggje føre dokumentasjon som viser at vilkåra er oppfylte. Dokumentasjonen må vere av nyare dato. Før søknader om unntak etter første ledd bokstav c kan bli behandla, skal det liggje føre ei sakkunnig vurdering. Den pedagogisk-psykologiske tenesta skal sørge for å få utarbeidd slik vurdering.

Rektor avgjer søknad om unntak i samsvar med vilkåra. Eleven eller lærlingen kan ikkje få førehandstilsegn om unntak etter denne paragrafen.

### **§ 3-45. Kompetansebevis**

Kompetansebevis blir skriva ut som dokumentasjon for vidaregåande opplæring i dei tilfella der vilkåra for å få vitnemål eller fag- og sveinebrev ikkje er oppfylte.

Kompetansebeviset skal vise kva for standpunkt- og eksamenskaraktarar som er oppnådde. I fellesfag der det ikkje skal setjast standpunktkarakter på lågare nivå, jf. læreplanverket, skal halvårsvurderinga med karakter som eleven får ved avslutninga av opplæringsåret, først på kompetansebeviset. Dette gjeld dersom eleven ikkje fullfører faget på nivået der læreplanverket fastset at standpunktkarakter skal givast. Det skal då først ein merknad om at karakteren som først er halvårsvurderinga med karakter. Kompetansebevis blir også skriva ut som dokumentasjon på gjennomgått opplæring i dei tilfella der eleven berre har fått opplæring i delar av eit fag.

For elevar skal kompetansebevis skrivast ut av skolen/skolane der eleven har oppnådd standpunkt- og eksamenskaraktarar. Fylkeskommunen er ansvarleg for å skriva ut kompetansebevis for lærlingar, lære kandidatatar og privatistar.

### **§ 3-46. Føring av karakterar i fag på vitnemål og kompetansebevis**

For elevar skal berre standpunktkarakterar og eksamenskaraktarar først på vitnemålet. Det er fastsett i læreplanverket når standpunktkarakter skal fastsetjast. Halvårsvurdering med karakter i fellesfag på lågare nivå skal ikkje først på vitnemålet.

I dei programfaga som har fleire nivå, skal alle standpunktkarakterar som er oppnådde på kvart nivå, først på dokumentasjonen.

I fag der det i læreplanverket er fastsett at privatistar kan ta eksamen på høgare nivå og få godskrive faget på lågare nivå, jf. § 3-13, skal eksamenskaraktaren/eksamenskaraktarane på høgaste nivå først.

Det er mogleg å få ført på vitnemålet karakterar i fag som går utover minstekravet til studie- eller yrkeskompetanse.

For privatistar skal berre eksamenskarakterar førast på vitnemålet. Eventuelle tidlegare standpunkt- og eksamenskarakterar i faget fell bort når privatisten får eksamenskarakteren ført på vitnemålet.

For elevar som får fritak frå vurdering, jf. § 3-22, men ikkje fritak frå opplæring i skriftleg sidemål, skal det for skriftleg sidemål stå « Delteke » på vitnemålet eller kompetansebeviset, ikkje talkarakter. For privatistar skal det stå « Friteken ».

For elevar i vidaregåande opplæring med individuell opplæringsplan som ikkje gir grunnlag for å fastsetje standpunktkarakter, jf. § 3-3, § 3-17 sjette ledd og 3-18, skal kompetansen til eleven dokumenterast på kompetansebeviset.

### **§ 3-47. Føring av fråvær i vidaregåande opplæring**

Alt fråvær skal førast på vitnemålet og kompetansebeviset. Fråvær skal førast i dagar og enkelttimar.

Rektor kan avgjere om fråvær for den som er deltids elev, skal førast i dagar og timar eller berre i timar. For elevar som skal ha kompetansebevis, skal fråvær førast på kompetansebeviset.

Eleven kan krevje at årsaka til fråværet blir ført på eit vedlegg til vitnemålet eller kompetansebeviset, dersom han eller ho legg fram dokumentasjon på årsaka til fråværet.

Dersom det er mogleg, skal eleven leggje fram dokumentasjon av fråværet frå opplæringa på førehand.

For inntil samanlagt 14 skoledagar i eit opplæringsår, kan ein elev krevje at følgjande fråvær ikkje blir ført på vitnemålet dersom det kan dokumenterast at fråværet skyldast:

- a) helse- og velferdsgrunnar
- b) arbeid som tillitsvald
- c) politisk arbeid
- d) hjelpearbeid
- e) lovpålagt oppmøte
- f) representasjon i arrangement på nasjonalt og internasjonalt nivå.

Organisert studiearbeid og skoleadministrative gjeremål etter avtale med faglæraren eller rektor, skal ikkje reknast som fråvær.

Innanfor ramma av 14 skoledagar kan elevar som er medlemmer av andre trussamfunn enn Den norske kyrkja, krevje at inntil to dagar fråvær som er knytt opp mot ei religiøs høgtid, ikkje blir ført på vitnemålet.

## **VII. Særskilde føresegner for fag-/sveineprøva og kompetanseprøva**

0 - Heile kapittel 3 endra ved forskrift 1 juli 2009 nr. 964 (i kraft 1 aug 2009).

### **§ 3-48. Fag- og sveineprøve**

Fylkeskommunen har ansvaret for at fag- og sveineprøva blir gjennomført i samsvar med reglane i dette kapitlet og med læreplanen i faget. Fylkeskommunen

har ansvaret for at prøve kandidatane er kjende med føresegnene som regulerer prøva.

Fag- og sveineprøva skal som hovudregel gjennomførast ved slutten av opplæringstida og skal normalt vere avslutta seinast innan to månader frå dette tidspunktet.

Prøva skal gjennomførast i den bedrifta lærlingen har hatt hovuddelen av opplæringa. Dersom prøva blir gjennomført i lærebedrifta, skal prøva tilpassast verksemda i bedrifta. Fylkeskommunen kan, etter å ha innhenta råd frå prøvenemnda, bestemme at prøva skal haldast ein annan stad.

### **§ 3-49. Kompetanseprøve for lærekandidatar**

Fylkeskommunen har ansvaret for at kompetanseprøva blir gjennomført i samsvar med reglane i dette kapitlet og med dei opplæringsmåla som er fastsette for kandidaten, jf. opplæringslova § 4-4. Fylkeskommunen har ansvaret for at prøve kandidatane er kjende med føresegnene som regulerer prøva.

Kompetanseprøva skal som hovudregel gjennomførast ved slutten av opplæringstida og skal normalt vere avslutta seinast innan to månader frå dette tidspunktet.

Prøva skal gjennomførast i den bedrifta lærekandidaten har hatt hovuddelen av opplæringa. Dersom prøva blir gjennomført i lærebedrifta, skal prøva tilpassast verksemda i bedrifta. Fylkeskommunen kan etter å ha innhenta råd frå prøvenemnda, bestemme at prøva skal haldast ein annan stad.

### **§ 3-50. Melding til fag-/sveineprøve og kompetanseprøve**

Lærebedrifta eller skolen melder lærlingen eller eleven til fag- eller sveineprøva. Lærebedrifta melder lærekandidaten til kompetanseprøva. Meldinga skal sendast til fylkeskommunen i det fylket der lærekontrakten eller opplæringskontrakten er registrert. For elevar skal meldinga sendast til fylkeskommunen der skolen ligg. Om melding av praksiskandidatar sjå § 3-55.

### **§ 3-51. Krav om bestått i fag for å framstille seg til fag- og sveineprøve for lærlingar og elevar**

Før fag- eller sveineprøva kan gjennomførast, skal lærlingen eller eleven som hovudregel ha bestått dei faga som er fastsette i fag- og timefordelinga for Vg1, Vg2 og eventuelt Vg3 i skole for vedkommande yrkesfaglege utdanningsprogram. Det same gjeld for eksamen etter § 3-52, § 3-53 og § 3-54.

Lærlingar og elevar som har følgd opplæringa, men ikkje har bestått i inntil to av fellesfaga, kan likevel få framstille seg til fag- eller sveineprøva. Desse lærlingane og elevane må bestå faga innan to år etter at fag- eller sveineprøva er halden, for at fag- eller sveinebrev kan utferdast. Sjå likevel unntak frå dette i § 3-67.

### **§ 3-52. Eksamen i læretida for særskilde lærefag**

Det kan i læreplanen for det einskilde lærefaget fastsetjast at eleven eller lærlingen skal gå opp til ein eigen eksamen før fag- eller sveineprøva.

Eksamene blir halden i regi av fylkeskommunen. Eksamenen utarbeidast sentralt og sensurerast lokalt.

### **§ 3-53. Eksamen i læretida for særløpsfag**

For det einstilte særlopsfaget er det fastsett i læreplanen for opplæring i bedrift at alle skal gå opp til ein eigen eksamen før fag- eller sveineprøva. Lærebedrifta melder lærlingen opp til eksamen. Meldinga skal sendast til fylkeskommunen i det fylket der lærekontrakten er registrert.

Eksamenen blir halden i regi av fylkeskommunen. Eksamenen utarbeidast sentralt og sensurerast lokalt.

**§ 3-54.** *Vurdering for lærlingar som har lærekontrakt som omfattar opplæring i programfag som er fastsette i fag- og timefordelinga for Vg1, Vg2 og eventuelt Vg3 i skole*

Når det i ein lærekontrakt inngår opplæring i programfag som er fastsette i fag- og timefordelinga for Vg1, Vg2 og eventuelt Vg3 i skole, skal lærlingen gå opp til ein eksamen etter nærmare føresegner frå Utdanningsdirektoratet.

Eksamen skal prøve i kva grad lærlingen har nådd kompetansemåla som er fastsette i den læreplanen for opplæring i bedrift som lærlingen har teikna lærekontrakt i.

I lærefag som kjem inn under § 3-52, skal eksamen prøve i kva grad lærlingen har nådd kompetansemåla som er fastsette i programfaga for Vg1, Vg2 og eventuelt Vg3 i skole.

Eksamen blir halden i regi av fylkeskommunen. Eksamen utarbeidast sentralt og sensurerast lokalt.

Lærebedrifta melder lærlingen opp til eksamen. Meldinga skal sendast til fylkeskommunen i det fylket der lærekontrakten er registrert.

**§ 3-55.** *Særlege føresegner om fag- og sveineprøve for praksiskandidatar*

Praksiskandidatar, jf. opplæringslova § 3-5, må sjølve melde seg til fag- og sveineprøve. Meldinga går til fylkeskommunen innan fristar som fylkeskommunen fastset. Innhaldet i og omfanget av fag- og sveineprøva er fastsett i § 3-57.

Før praksiskandidatar melder seg til fag- eller sveineprøve, skal dei ha bestått ein eigen eksamen etter nærmare føresegner frå Utdanningsdirektoratet.

Eksamen skal prøve i kva grad den einstilte praksiskandidaten har nådd kompetansemåla som er fastsette i den læreplanen for opplæring i bedrift som praksiskandidaten tek sikte på å ta fag- eller sveineprøve i.

I lærefag som kjem inn under § 3-52, skal eksamen prøve i kva grad den einstilte praksiskandidaten har nådd kompetansemåla som er fastsette i programfaga for Vg1, Vg2 og eventuelt Vg3 i skole, og som er relevante for lærefaget. Eksamen skal vere bestått før ein praksiskandidat melder seg til fag- eller sveineprøve.

Eksamen utarbeidast sentralt og sensurerast lokalt.

Dersom prøvenemnda ber om det, kan praksiskandidaten kome med forslag til kvar fag- eller sveineprøva kan haldast, og korleis prøva kan gjennomførast.

Dersom praksiskandidaten ikkje består fag- eller sveineprøva, kan ny prøve tidlegast haldast etter seks månader.

Praksiskandidatar skal betale prøveavgift etter fastsette satsar.

**§ 3-56.** *Prøvenemnd for fag- og sveineprøve*

Prøvenemnda for fag- eller sveineprøva blir oppnemnd og administrert av fylkeskommunen, jf. opplæringslova § 4-8. Ho skal ha minst to medlemmer som har formell fagleg kompetanse innanfor fagområdet, og så langt det er mogleg, har oppdatert arbeidslivserfaring i faget. Fylkeskommunen skal sikre at det blir tilfredsstillande vurderingsfagleg kompetanse i prøvenemnda.

Fylkeskommunen skal hente inn forslag til medlemmer i prøvenemnda frå partane i arbeidslivet. Fylkeskommunen kan om nødvendig hente inn forslag også frå andre.

Medlemmene må normalt vere eksterne i forhold til lærebedrifta eller skolen der kandidaten har fått opplæring.

### **§ 3-57. Innhald i og omfang av fag- og sveineprøva**

Prøvenemnda har ansvaret for utforminga av fag- og sveineprøva. Lærebedrifta, eventuelt skolen som alternativ til opplæring i bedrift, kan komme med forslag til arbeidsoppgåver.

Fag- og sveineprøva skal prøve kandidaten sin kompetanse i faget slik denne er beskriven i læreplanen for opplæring i bedrift i lærefaget. Alle kompetansemåla i læreplanen for faget skal kunne prøvast. Arbeidsoppgåvene i prøva skal reflektere krava til fagleg kompetanse. Prøvenemnda har ansvar for at kandidaten sin kompetanse i faget blir prøvd på forsvarleg måte.

Opgåva skal klart definere innhaldet i det ein forventar av kandidaten sitt arbeid. Innanfor ramma av kompetansemåla i læreplanen skal oppgåva prøve kandidaten i

- a) planlegging av arbeidet og grunngiving for valde løysingar
- b) gjennomføring av eit fagleg arbeid
- c) vurdering av eige prøvearbeid
- d) dokumentasjon av eige prøvearbeid.

Omfanget av prøva skal vere klart definert og innanfor den tidsramma som er fastsett i læreplanen.

Prøvenemnda kan i ein oppsummerande samtale til slutt stille spørsmål til fagleg avklaring.

Opgåva må utformast slik at ho gir kandidaten reell moglegheit til å utføre eit kvalitetsmessig godt arbeid innanfor fastsett tidsramme. Dei hjelpemidla kandidaten har brukt i læretida, skal kunne nyttast under prøva. Det skal gå tydeleg fram korleis dei ulike delane av prøva skal leverast.

I tillegg til oppgåva, skal prøvenemnda samstundes utarbeide eit grunnlag for vurdering av kandidaten sitt arbeid med fag- eller sveineprøva. Hovudpunkta i grunnlaget skal gjerast klare for kandidaten.

### **§ 3-58. Gjennomføring av fag- og sveineprøva**

Prøvenemnda skal vere på prøvestaden ved prøvestart og prøveslutt, og skal utføre nødvendig inspeksjon og vurdering av kandidaten sitt arbeid i prøveperioden og ved prøveslutt. Fylkeskommunen er ansvarleg for at det blir ført tilsyn under heile prøva. Prøvenemnda kan ikkje delegerare ansvaret for å vurdere kandidaten til tilsynspersonar.

Ved prøvestart skal prøvenemnda levere oppgåva til kandidaten.

Prøvenemnda skal føre protokoll der dei ulike sidene ved prøvegjennomføringa blir dokumenterte. Prøveprotokollen skal vere så utfyllande at han kan gi eit godt bilete av sjølve prøvegjennomføringa i ei eventuell klagebehandling.

### **§ 3-59. Vurdering av fag- og sveineprøva**

Prøvenemnda skal vurdere kandidaten sin kompetanse slik han er dokumentert gjennom fag- eller sveineprøva, og fastsetje karakter.

Karakteren skal gi uttrykk for i kva grad kandidaten har nådd måla i læreplanen for faget som kandidaten er prøvd i.

Ved vurderinga skal den tredelte skalaen som er fastsett i § 3-4 sjette ledd, brukast.

Fylkeskommunen fastset ved oppnemninga kven av medlemmene i prøvenemnda som skal avgjere karakteren, dersom det er usemje når stemmetalet er likt.

### **§ 3-60. Utarbeiding, innhald og vurdering av kompetanseprøva**

Fylkeskommunen har ansvaret for at kompetanseprøver blir utarbeidde og vurderte. Lærekandidatane skal prøvast i forhold til dei måla som er fastsette for kandidaten, jf. opplæringslova § 4-4. Innanfor dei rammene som opplæringsmåla set, skal prøva utarbeidast og gjennomførast etter same prinsipp som for fag- og sveineprøver, jf. § 3-57 og § 3-58.

Karakteren skal gi uttrykk for i kva grad kandidaten har nådd måla som er fastsette for kandidaten.

Ved vurderinga skal den tredelte skalaen som er fastsett i § 3-4 sjette ledd, brukast.

Fylkeskommunen er ansvarleg for at det blir ført protokoll der dei ulike sidene ved prøvegjennomføringa blir dokumenterte. Prøveprotokollen skal vere så utfyllande at han kan gi eit godt bilete av sjølve prøvegjennomføringa i ei eventuell klagebehandling.

### **§ 3-61. Oppbevaring av prøvearbeid for fag- og sveineprøva**

Er fag- eller sveineprøva ikkje bestått, skal prøvenemnda i samråd med fylkeskommunen syte for oppbevaring av prøvearbeidet. Prøvearbeidet skal så langt råd er, takast vare på slik kandidaten leverte det frå seg. Dersom prøvearbeidet ikkje kan takast vare på, skal det sikrast med fotografi eller ei nøyaktig beskriving med tanke på framlegging i ei eventuell klagebehandling.

### **§ 3-62. Ny fag- og sveineprøve og kompetanseprøve**

Dersom fag- eller sveineprøva eller kompetanseprøva ikkje er bestått, kan lærlingen, eleven eller lærekandidaten melde seg til ny prøve. Læretida kan eventuelt bli forlengd ved frivillig avtale mellom lærebedrifta og lærlingen eller lærekandidaten. Fylkeskommunen har ansvaret for gjennomføringa av ny fag- eller sveineprøve eller kompetanseprøve. Fylkeskommunen dekkjer utgiftene som lærebedrifta har med å gjennomføre prøva.

Dersom ein praksiskandidat ikkje består fag- eller sveineprøva, kan han eller ho melde seg til ny prøve. Denne kan tidlegast takast seks månader etter prøva som ikkje var bestått. Praksiskandidatar må sjølve melde seg til ny fag- eller sveineprøve og betale ny prøveavgift.

### **§ 3-63. Utsett fag-/sveineprøve og kompetanseprøve**

Ein lærling, elev, praksiskandidat eller lærekandidat som har dokumentert fråvær ved fag-/sveineprøva eller kompetanseprøva, har rett til å framstille seg til utsett prøve. Utsett prøve skal haldast så snart det er praktisk mogleg.

Fråvær frå prøva blir rekna som dokumentert når lærlingen, lærekandidaten eller praksiskandidaten er hindra frå å stille til prøva, når hindringa er uføreseieleg og han eller ho elles ikkje kan lastast for hindringa. Kandidaten må leggje fram dokumentasjon på dette.

Praksiskandidatar må sjølve melde seg til utsett fag- eller sveineprøve og betale ny prøveavgift.

### **§ 3-64. Særleg tilrettelegging av fag-/sveineprøva og kompetanseprøva**

Lærlingar, lærekandidatar, elevar eller praksiskandidatar med behov for særskild tilrettelegging skal kunne få forholda lagde til rette slik at dei kan få vist kompetansen sin ut frå kompetansemåla i læreplanen for faget. Fylkeskommunen kan samtykkje i at gjennomføringa av fag-/sveineprøva eller kompetanseprøva blir særskild tilrettelagd. Tiltaka må vere tilpassa behova til lærlingen, lærekandidaten og praksiskandidaten så langt råd er.

Tiltaka må ikkje føre til at lærlingen, lærekandidaten, eleven eller praksiskandidaten får fordelar framfor andre som ikkje får tilrettelegging av prøva. Tilrettelegginga må heller ikkje vere så omfattande at lærlingen, lærekandidaten, eleven eller praksiskandidaten ikkje blir prøvd i kompetansemåla i læreplanen for faget. Der det i kompetansemåla er kravd skriftlege, munnlege eller praktiske ferdigheiter, er det ikkje høve til å leggje til rette prøva slik at desse ferdigheitene ikkje blir prøvde.

Fylkeskommunen avgjer etter søknad kva for ordningar som skal nyttast for lærlingar, lærekandidatar, elevar og praksiskandidatar. Avgjerda til fylkeskommunen er eit enkeltvedtak som kan påklagast etter reglane i forvaltningslova. Fylkeskommunen kan krevje uttale frå ein sakkunnig instans. Særskild tilrettelegging av prøva krev ikkje enkeltvedtak om spesialundervisning.

### **§ 3-65. Reaksjonsmåtar ved fusk**

Fag-/sveineprøve og kompetanseprøve kan annullerast dersom kandidaten har fuska eller forsøkt å fuske ved prøva.

Spørsmålet om annullering av fag- eller sveineprøva skal avgjerast av prøvenemnda. Fylkeskommunen avgjer kven som kan annullere kompetanseprøva. Lærlingen, lærekandidaten, eleven eller praksiskandidaten skal ha høve til å uttale seg munnleg for den/dei som tek avgjerda, før det blir gjort enkeltvedtak om annullering av prøva. Lærlingen, lærekandidaten, eleven eller praksiskandidaten har likevel rett til å fullføre prøva. Enkeltvedtak om annullering av fag- og sveineprøve eller kompetanseprøve kan påklagast til fylkesmannen.

Dersom fag-/sveineprøva eller kompetanseprøva blir annullert på grunn av fusk eller forsøk på fusk, kan kandidaten gå opp til ny prøve tidlegast eit år etter den annullerte prøva.

### **§ 3-66. Bortvising frå fag-/sveineprøva og kompetanseprøva**

Lærlingar, lærekandidatar, eleven og praksiskandidatar skal ikkje hindre eller forstyrre gjennomføringa av fag-/sveineprøva eller kompetanseprøva. Dersom

åtfërda til ein kandidat er i strid med denne føresegna, kan kandidaten etter å ha blitt åtværa, visast bort. Leiaren av prøvenemnda avgjer spørsmålet om bortvising frå fag- og sveineprøva. Fylkeskommunen avgjer kven som kan vise bort kandidatar frå kompetanseprøva. Kandidaten skal ha høve til å uttale seg munnleg for den som tek avgjerda, før det blir gjort enkeltvedtak om bortvising.

Dersom ein kandidat får medhald i klage på bortvising, har han eller ho rett til ny fag-/sveineprøve eller kompetanseprøve.

### **§ 3-67. Krav til fag- og sveinebrev**

Fag- eller sveinebrev blir utferda som dokumentasjon for bestått fag- eller sveineprøve.

Før fag- eller sveinebrev kan utferdast, må normalt alle relevante fag og eksamenar vere bestått.

I særskilde tilfelle kan fag- eller sveinebrev likevel utferdast til lærlingar og elevar sjølv om dei ikkje har bestått i inntil to av fellesfaga, jf. § 3-51 andre ledd. Samtykke til slikt unntak kan bli gitt når:

- a) lærlingen eller eleven har vore friteken for vurdering med karakter i faget eller faga i grunnskolen
- b) lærlingen eller eleven har vore friteken for vurdering med karakter i faget eller faga i den vidaregåande skolen
- c) lærlingen eller eleven har spesifikke lærevanskar, t.d. store lese- og skrivevanskar eller store matematikkvanskar. Slike vanskar kan også vurderast etter at standpunktkarakteren er sett eller eksamen eller fagprøva er gjennomført.

Før søknader om unntak kan behandlast, skal det liggje føre dokumentasjon som viser at vilkåra er oppfylte. Før søknader om unntak etter punkt c) kan bli behandla, skal det liggje føre ei sakkunnig vurdering frå den pedagogisk-psykologiske tenesta. Fylkeskommunen avgjer søknader om unntak i samsvar med vilkåra ovanfor. Vedtak kan tidlegast gjerast i samband med overgangen til læreforhold. Det kan ikkje bli gitt førehandstilsegn om unntak etter denne føresegna.

Praksiskandidatar er fritekne frå kravet til fellesfag for å få utferda fag- eller sveinebrev.

I dei lærefaga der det er knytt offentleg nasjonal eller internasjonal sertifisering til eit utferda fag- eller sveinebrev, kan ein ikkje gi fritak i strid med slike sertifiseringsføresegner. Dette gjeld både elevar, lærlingar og praksiskandidatar.

Fylkeskommunen skal gjere bedriftene merksame på dei høva til unntak og fritak som en nemnde ovanfor, når det blir teikna kontrakt.

Fylkeskommunen er ansvarleg for utferding av fag- eller sveinebrev.

### **§ 3-68. Vitnemål og kompetansebevis**

Det skal også utferdast vitnemål som dokumentasjon for bestått fagopplæring, jf. § 3-42. Vitnemålet kjem i tillegg til fag- eller sveinebrev.

Kompetansebevis blir utferda som dokumentasjon for vidaregåande opplæring når vilkåra for å få fag- eller sveinebrev eller vitnemål ikkje er oppfylte. Krava til kva kompetansebeviset skal vise, står i § 3-45.

Kven som er ansvarleg for å utferde vitnemål og kompetansebevis, er regulert i § 3-42 og § 3-45.







HORDALAND  
FYLKESKOMMUNE

Opplæringsavdelinga  
Agnes Mowinckels gt 5  
Postboks 7900  
N-5020 BERGEN

Telefon: 55 23 94 60  
[www.hordaland.no](http://www.hordaland.no)